

Visoki predstavnik Inzko se sastao sa premijerom Federacije FBiH Nikšićem



Visoki predstavnik Valentin Inzko sastao se danas sa premijerom Federacije Bosne i Hercegovine Nerminom Nikšićem, kako bi razgovarali o situaciji koja je nastala kao rezultat propusta nadležnih organa vlasti da blagovremeno imenuju nove članove u Komisiju za vrijednosne papire Federacije BiH. Više od četiri godine nakon što je taj posao trebao biti završen, Predsjedništvo Federacije i Parlament još uvijek nisu izvršili neophodna imenovanja. Sagovornici su izrazili žaljenje što autentično tumačenje Zakona o Komisiji za vrijednosne papire Federacije BiH, koje je trebalo riješiti ovaj problem, nije dobilo dovoljnu podršku u Zastupničkom domu Parlamenta FBiH i saglasili su se da se mora pronaći hitno rješenje kako bi se ublažile implikacije na tržište kapitala u Federaciji BiH.

U tom pogledu, visoki predstavnik Inzko i premijer Nikšić razgovarali su o konkretnim koracima kako bi se afirmisao princip kontinuiteta u radu, na način koji bi osigurao institucionalnu stabilnost i pravnu sigurnost kao stubove svakog pravnog sistema. Ovo je također ključno za investicijske odluke koje imaju potencijal za otvaranje prijeko potrebnih radnih mjesta u ovoj zemlji.